

Vakavakarau mo veivakavulici vinaka ena vuli tara

DRIVE

Na idusidusi ogo e kena ni inaki me vukei iko mo tuvanaka na ivakarau ni veivakavulici e matau me rawa ni yaga vua na nomu gonevuli na veika e vulica.



Vakarautaka na veika o na vakavulica

Na veivakavulici vinaka e sega ni okati walega kina na nona vodo e dua ena motoka me draiva. E levu na ka e okati kina.

Mo tekivu ena nomu vaqara na vanua e veiganiti kei na kena ituvaki o vakavulica, qori na gaunisala se vanua ni vakele lori e galala vinaka tu. Oti qai vakatulewataka na veika o vinakata me vakabibitaki, me kakua ni sivia sara na ka e vakavulici.

Waraka me sa matau ena veika me vaka na - nona tekivuna kei na nona tosoya na lori, nona vakayagataka na iuli kei na nona bereki - ni bera ni o vakalaivi koya me draiva e gaunisala kei na so tale na lori.

Na gauna sa vakamatautaki koya kina ena veika qori o qai kila ni sa rawa ni draiva, mo vakamatautaki koya ena duidui ituvaki me vaka na nona draiva ena gauna e tau kina na uca, ena bogi se na gaunisala qereqere. Ena matau cake vua ni o tiko ekea mo veitokoni ena imatai ni gauna e sotava kina na veituvaki qori.



Me lekaleka ga na gauna ni veivakavulici

eso ena rairai balavu tale vei ira na 30 miniti mera draiva tiko, vakabibi ni se imatai ni gauna era cakava kina qori. Na imatai ni nomudrau veivakavulici e rawa ni okati ga kina na nona nomu vakaraitaka vua na veika me tabaka ena nona lori ni draiva tiko kei na nomudrau vakatovotovo vakavica ena dua na vanua rawarawa ga.

Ni sa kila rawa o koya na veika rawarawa me yavalata kina na lori - nona rawa ni sikinala, raica na iloilo qai vakaraica na yasana imawi se matau - sa na rawa ni balavu cake nomudrau veivakavulici.



Mo drau veivosaki rawa ni bera ni drau draiva

Ni bera ni tekivu na siga yadua ni vuli, mo vosa vua nomu gonevuli ena vanua drau na lako kina kei na veika o vinakata me vakamatautaki koya kina ena gauna qori. Ena sega ni tavaiyaya kina o gonevuli.



Mo kakua ni vakusakusa

Na vakavulici ni veika vovou ena rawa ni dede toka qai na gadrevi me vakatovototaka vakavica o koya e vuli ni bera ni matata vua na veika kece. Kevaka mada ga e donu ena imatai ni gauna na veika e cakava o gonevuli, e sega ni kena ibalebale qori ni sa taura na ka e vakavulici kina. Kevaka e se lomalomaruataka tiko ga, vakatovototaka tale vakavica.



Mo vakaraitaka, kua ni tukuna wale ga

Na nomu vakaraitaka sara ga na sala e vakayacori kina e dua na ka e vinaka cake mai na nomu tukuna wale ga vua o vakavulica tiko na ka me cakava. Mo tu vakarau mo vakaraitaka vua vakavica vata qai vakayaloqaqataki ira, vakabibi ke cala ena imatai ni gauna na veika era cakava.



Me matata na nomu veivakavulici ni se qai tekivu

Ena gauna ni veivakavulici, mo kauwaitaka vakabibi na veika o vinakata me na vakayacora o koya qai saga me rawarawa ga qai lekaleka na nomu ivakasala. Mo solia na gauna vei koya o vakavulica me rawa ni kila na ka o tukuna qai muria na nomu ivakasala, ena yasana a dua e se rawa tiko ga ni draiva vakavinaka.



Vakarorogo

Kevaka e kaya o koya o vakavulica ni leqataka e dua na ituvaki, mo taroga na vuna. Kena irairai ni rawa ni sega ni se matau vua na ka o vakavulica me dewa kina ena dua tale na ka, mo solia gona vua na gauna me vakamatautaki koya qai lomavakacegu ni sa kila vinaka sara.



Mo vakayagataka na iwalewale e vakatokai na WASP mo vukei koya kina ni cala

Mera kila tiko ni sega ni leqa kevaka era cala. Ena sega ni imatai ga ni gauna sa na taura kina o gonevuli na ka me caka me donu vinaka. Era na cala - ya e dua na tiki bibi ni vuli. E nomu itavi mo vukei ira ena gauna era cala kina, qai vakadeitaka ni na sega ni vakaleqai eso tale ena cala era vakayacora. Na iwalewale e vakatokai na WASP e dua na sala vinaka mo vukei nomu gonevuli kina ni cala.

- **Wait (Waraka)** – mo raica mada ke sa kila rawa o koya e vuli na cala e cakava.
- **Ask (Taro)** – kevaka era sega ni tukuna e dua na ka, tarogi ira mada kevaka era kila na cala.
- **Show (Vakaraitaka)** – kevaka era sega ni kila rawa, vakaraitaka vei ira.
- **Practise (Vakatovotovo)** – vakatovotovotaka sara vakavica na ka me vakamatautaki koya kina me kila.

Kevaka sa tekivu vakayacora e vica vata na cala o koya o vakavulica sa lai vakavuna kina me dua vei kemudrau e vuturi se cudru, qori e rawa ni vakatakila ni sa dredre vua na ka e vulica tiko se sa rairai balavu tale na gauna ni veivakavuili. Ena vinaka me cegu sara ga ena gauna qori na vuli qai tomani ena dua tale na siga, mai na nomu vakalaiva ga me lai ca sara.



Kua ni cudru

Mo kua ni cudru ke berabera nona kila rawa na ka o koya o vakavulica. Era duidui na gonevuli kei na ivakarau ni nodra ciqoma na ka, ena rairai sotava tale tiko ga e dua na ituvaki o rairai sega ni kila. Ena rairai vinakati mo drau cegu mada na vuli ena loma ni dua na gauna.



Drau railesuva tale na ka e sa vulica oti

Me biuta toka vakatikitiki e vica na miniti ni oti na vuli yadua mo drau veivosakitaka tale kina kei gonevuli na ka sa vulica. Mo drau veivosakitaka na veika e sa mai vulica qai taroga na nona nanuma me baleta na veika sa vulica qori kei na veika e vakila. Kena ivakaraitaki:

- Nikua daru cakava na x, y kei na z.
- Vakacava mada na x cava nomu nanuma?
- Au raica ni o vakayacora vinaka sara na y.
- Cava nomu rai ena sala me vakavinakataki kina na z?

Kevaka o iko se o koya o vakavulica e nanuma ni sega ni vakayacora vinaka tiko e dua na ka, mo vakadeitaka na vuna. De dua mo na vakaraitaka vakavica vata vua na sala me vakayacora kina.

Kena ilutua, mo tukuna vua na veika o nanuma me vakamatautaki koya kina ena nona vakatovotovo, qai vakamacalataka vakalekaleka na veika ena vulica tiko ena leseni tarava.